

A creación de textos c@s alumn@s

Participantes:

María Fernández Prieto

Efigenia Louro Otero

M^a Nieves Martínez Serrano

José Carlos Pérez López

Neste curso de *A creación literaria e aprender a escribir* tivemos ocasión de coñecer e practicar diferentes recursos, estratexias e actividades para fomentar a expresión escrita e a creación de textos. Decidimos poñer en práctica algúns co noso alumnado. O obxectivo principal que nos animaba era conseguir un achegamento á experiencia literaria en rapaces tan pequenos, invertindo os roles clásicos e pasando de ser meros consumidores de textos literarios a creadores das súas propias obras, amén de que todo o proceso resultase nunha experiencia non só enriquecedora senón tamén lúdica e polo tanto motivadora.

Imos presentar e comentar tres de elas: a elaboración de acrósticos en terceiro de primaria, un bestiario en primeiro de primaria e un conto en educación infantil de catro anos.

♦ O conto en educación infantil de catro anos.

Partindo da escala musical, que eles coñecen, escolleron as sílabas para facer o nome do animal e despois intentamos crear unha historia dese animal fantástico entre todos os/as nenos/as de este grupo de infantil.

A actividade resultou moi motivadora e participativa, pois colaboraban os nenos/as dicindo lugares, comidas e comentando feitos que estaban relacionados coa súa vida cotiá.

Chamoulles a atención o resultado final e remataron a actividade debuxando a “Dosila”, a gata fantástica que eles mesmos crearon.



A través do conto xurdiron moitos temas na aula que puidemos traballar: a hixiene dos animais nas rúas, lugares onde ou que coñecemos, comidas que nos gusta,...

Este e o conto que resultou:

Dosila


Dosila é unha gata pequena, con peliños nos papos, unha boca grande e un nariz pequerrecho. Ten unha cola longa... cun laciño na punta.

A Dosila gústalle xogar á pelota e é moi glotona, come penso, pementón, lentellas, patacas fritas e polo.



Dosila ten unha dona, Pepita, que a saca a pasear cunha correa todos os días ao parque. Durante o paseo fai pis e caca e Pepita recolle as cacas nunha bolsa para que non quede a rúa sucia nin resbale a xente. Cando volta do paseo, a Dosila gústalle durmir nun saquiño suave e redondo que Pepita lle fixo con algodón.

Dosila ten moitos amigos, gatos e gatas que atopa por Fisterra, Buxán, San Martiño, Corcubión, Carballo, Cee... e con eles pelexa, xoga ao escondite, comen xuntos e poñen sementes para que nazan outros gatiños. Colorín colorado este conto está rematado.



◆ Un Bestiario en primeiro de primaria.

Despois de diversos intentos máis ou menos afortunados cos acrósticos e caligramas, optamos pola fórmula do Bestiario ao concordar que era a que mellor se adaptaba ao nivel de coñecementos lingüísticos dos nosos alumnos, tanto a respecto do vocabulario como dos recursos formais dos que dispoñen. Igualmente convén mencionar que se trata dun curso composto por 21 nenos e nenas, bastante inquedos e con grandes anceios por se comunicar, así que consideramos que o plantexamento

colectivo da actividade era a mellor maneira de que todos poidesen aportar algo á mesma, independentemente das súas capacidades individuais, co cal nos evitariamos por outro lado posibles frustracións.

O proceso desenvolveuse do seguinte xeito:

- Primeiro explicámoslles que entendemos polo termo Bestiario e en que consistiría a elaboración do mesmo.
- A continuación discutimos en grupo que tipo de cualidades quixeríamos que tivese o noso animal imaxinario e como se plasmaría esto nos seus rasgos e características físicas así como de carácter, costumes, etc.
- Despois de apuntar na pizarra as principais ideas *xeradoras* elixidas para o noso animal iniciamos o proceso propiamente dito da elaboración do mesmo, principiando pola descrición física para posteriormente pasar ás cualidades, hábitos e demais. Isto fíxose seguindo un rigoroso turno de palabra para así evitar tanto o caos como garantir a aportación de todo o colectivo.
- Finalmente cando xa tínhamos unha idea bastante clara do noso animal fantástico pasamos a poñer en orde as ideas aportadas e a redactalas nun texto. Neste caso é cando a figura do mestre adquire maior relevancia ao actuar sobre o resultado final do texto, pulindo e retocando aqueles aspectos que fan que os elementos aportados polos alumnos encaixen nun todo.

O resultado final aportanos a satisfacción dun traballo realizado en grupo, no que todos os alumnos se poidan sentir identificados como autores colectivos, incluso os menos dotados e inseguros.

Asimesmo permiteltes poñer en uso tanto os recursos expresivos e vocabulario aprendidos como todos os seus coñecementos previos a cerca dos animais, amosándolles deste xeito que a creación literaria nos obsequia con resultados as veces sorprendentes, partindo simplemente do emprego dun xeito innovador e imaxinativo de elementos e ferramentas presentes naturalmente na linguaxe e no noso entorno.

Como exemplo da nosa práctica incluimos o seguinte Bestiario elaborado na clase de lingua:

“O noso animal ten cabeza de tigre pero coas orellas de elfo e o pescozo moi longo como o da xirafa. No alto da cabeza tamén ten tres cornos de touro. O seu corpo é ovalado e todo cuberto de escamas douradas e pinchos polas costas e saenlle igualmente dos lados dúas ás de gaivota. Ten unha soa pata pero ben grande; en cambio a súa cola é pequeniña coma a do elefante.

É un animal herbívoro ao que lle gustan especialmente os pétalos de rosa. Se

alguén o ataca ou se enfada e capaz de escupirlos á cara. Pon ovos cadrados de moitas cores nun niño feito de arames de ferro. Vive nas covas escuras dos volcáns da xungla onde coida das súas crías e así pódela protexer do frío. Os seus mellores amigos son os dragóns cos que van de viaxe voando a Australia. Cando está contento fai un son parecido o ronroneo dos gatos e cando está enfadado berra coma un elefante cando lle pisan a trompa. Sabe recoller e lavar os pratos moi ben despois de comer, polo que podemos ver que é un animal moi limpo e ben educado. Este tipo de animal fantástico chámase Korwuain e quedan moi poucos no mundo porque os cazadores búscanos nas xunglas de Africa para facer colares coas súas escamas douradas e palillos de dentes cos pinchos das súas costas.”

◆ Os acrósticos en terceiro de primaria.

O noso obxectivo era a creación de textos poéticos cos alumnos/as de terceiro de educación primaria que xa traballaran este tipo de textos noutros momentos do curso (lecturas individuais e colectivas de poemas, comprensión lectora dos mesmos, familiarización cos aspectos formais dos mesmos: versos, estrofas, rimas...) pero non intentaran ata agora elaborar ningún.

Para facilitarlle a tarefa e facelo de forma motivadora escollimos realizar acrósticos entre todos. Os pasos a seguir foron os seguintes:

- Explicarlles que era un acróstico e como o íamos realizar.
- Elexir a palabra xeradora do acróstico e sobre a que ía tratar a estrofa.
- Pedir ideas de versos que empezaran pola letra correspondente e que falaran dese tema. Dixéronse moitos e entre todos escollemos os que máis gustaban. Pouco a pouco íámoslos cambiando ata que encaixaba no conxunto da estrofa.
- Cando non sabían como empezar o verso, pedíamoslles que dixeran palabras relacionadas co tema que empezaran con esa letra. Con esas palabras de axuda éralles máis doado facer un verso.
- Unha vez que tiñamos un verso para cada letra, limos a estrofa varias veces para ver que tal sonaba a estrofa final. Case sempre tiñamos algún verso que non quedaba moi “poético” (eles mesmos decidían cales eran) entón tratábase de melloralo dando ideas entre todos.
- Para melloralos utilizabamos comparacións, personificacións, elipsis e incluíamos adxectivos axeitados.

Observamos que participaron activamente todos os nenos/as, incluso aqueles que normalmente dicían que non sabían escribir textos. Utilizaron moito vocabulario e

tivemos ocasión de repasar contidos de lingua xa traballados como palabras sinónimas, familias de palabras, ortografía...

Algúns dos acrósticos elaborados foron os seguintes:

Bonito e verde bosque,

O bufo e o oso falan,

Se escoitamos soñamos.

Que bonito están os piñeiros!

Un lobato xoga namorado.

E que fermoso é o bosque!

Pouca auga hai,

Rochas cheas de sal,

Area, area e moita area.

Ía correndo de novo ata o mar.

Ata o próximo verán.

Hai moitas máis actividades propostas neste curso, que nos pareceron interesantes, que poñeremos en práctica para tentar que os nosos alumnos melloren a súa expresión escrita e a súa creatividade literaria.